

TEZAUUR LITURGIC
26 DECEMBRIE

ACATISTUL
SF. CUVIOS
NICODIM
DE LA
TISMANA



MOSCOVA, 2000



Акафист Преподобному Никодиму Тисманскому

Кондак 1

Избранному угоднику Божию и преславному учителю нашему и помощнику, хвалу приношаем, мы раби твои, яко заступнику великому, но яко имеяй дерзновение пред Господем, от всяких нас бед свободи, да зовем ти:

Радуйся, отче Никодиме, чудотворче.

Икос 1

Ангели на Небеси хвалят тя, преподобне отче, равноангельному житию твоему дивящися: инок же множество, сичевыя песни радостно приносят ти:

Радуйся, ангелов удивление:

радуйся, демонов прогонителю.

Радуйся, райское всеплодие:

радуйся, безплотных подражателю.

Радуйся, преподобных венче:

радуйся, благо духовное душ наших.

Радуйся, своя Лавры защитниче:

радуйся, монахов учителю.

Радуйся, светлосте небесная:

радуйся, сущих во узах прибежище.

Радуйся, сосуде Духа Святаго:
радуйся, пустынный веселие:
Радуйся, отче Никодиме, чудотворче.

Кондак 2

Видяще твою от юности ангельскому житию
ревность, отче Никодиме, и еже на Святей Горе
Афонстей подвижи твоя иноческа и любовь
твою Божественную, дивимся, и песнь о тебе
приносим Богу: Аллилуиа.

Икос 2

Разумевши Лавра Хиландарская ты отрасль
корене владычня, в немже Дух Божий обитает, в
веселии прият ты, мы же силе благодати сущей в
тебе дивящися, отче, радостию поем сице:
Радуйся, Святыя Горы похвало:
радуйся, богословия пресветлый уме.
Радуйся, подвижниче ревностный:
радуйся, Лазаревичей светлосте.
Радуйся, сердце, духовныя радости исполнено:
радуйся, фимиаме благоприятный.
Радуйся, подателю душам нашим потребнаго:
радуйся, всякаго зла отвратителю.
Радуйся, Саввы Неманича сродниче:
радуйся, в егоже святей Лавре подвизавыйся.
Радуйся, небесный человекче:
радуйся, земный ангеле.
Радуйся, отче Никодиме, чудотворче.

Кондак 3

Силою Божественною бысть прот Лавре Хиландарстей, преподобне отче, и образ подвиг духовных: мы же, имуще тя заступника велия, радостно поем Богови: Аллилуиа.

Икос 3

Имуще звание от Бога, святе, да идеши во ину землю, еже просветити ю духовне правила Святыя Горы Афонския, благословение Матере Божия прият, сие исполни, преподобне: и стада монахов возрастил еси, образ тем быв, яже приношают ти сие:

Радуйся, монахов светлосте:

радуйся, утешение наше.

Радуйся, усердный подвижниче:

радуйся, всех божественных даров исполнение.

Радуйся, иноческаго жития устройтелю:

радуйся, пустынное процветение.

Радуйся, во узах сущих помощниче:

радуйся, нечистых духов прогонителю.

Радуйся, отче богоносне:

радуйся, от всякаго зла защитниче.

Радуйся, пастырю преблагий:

радуйся, Православия охранителю.

Радуйся, отче Никодиме, чудотворче.

Кондак 4

Бурю волн Дунавских укрощая, тыя крестом оградил еси, святе, яко рече ти великий Антоний, и яко по суху на другую страну прешел еси, воспевая Богу: Аллилуиа.

Икос 4

Слышав воевода Влайко желание твое, отче, обитель устроить, в нову землю пришедшу, исполни и, и милостивно ти глаголаше:

Радуйся, ангеле благовестниче:

радуйся, монашеских уставов хранителю.

Радуйся, яко и волны дунавския послушаху тя:

радуйся, от Великаго Антония благословение приявый.

Радуйся, христиан благочестивых радости:

радуйся, многих людей просветителю.

Радуйся, всех христианских земель веселие:

радуйся, яко сын теми приятый.

Радуйся, у Водицы пустынником место освятивый:

радуйся, яко труды твоя Бог благослови.

Радуйся, дальних краев просветителю:

радуйся, смирения велий учителю.

Радуйся, отче Никодиме, чудотворче.

Кондак 5

Якоже желает елень на источники водныя, тако и твоя душа, отче, божественным званием

вселися при источницах вод в пещере, со Ангелы купно поющи Богу: Аллилуиа.

Икос 5

Егда изгнал еси демона из пещеры, иже ти возбранити бе хотя, четыредесет дней и четыредесет ночей провел еси в непрестанней молитве, да Бог ти открыет волю Свою, идеже воздвигнеши великую лавру в честь Его Пречистыя Матере: тем услыши Бог желание твое, мы же ти с радостию поим сице:

Радуйся, в пещере подвизавыйся:

радуйся, яко исполнился молитва твоя.

Радуйся, святых подвигов любителю:

радуйся, высшую духовную науку познавый.

Радуйся, божественных вещей строителю:

радуйся, монашеских соборов учителю.

Радуйся, на высоту возвысивыйся:

радуйся, сердец христианских утешение.

Радуйся, святых Божиих мест ревнителю:

радуйся, Святаго Духа обителище.

Радуйся, отче, наш учителю:

радуйся, божественных даров приемниче.

Радуйся, отче Никодиме, чудотворче.

Кондак 6

Егда в молитве бдел еси на камени три дни и три ночи, отче, божественная светлость осия тя и яко светлый столп от неба до земли явися, из

негоже Бог заповеда ти, да на том месте
воздвигнеши жертвенник, ты же, светлостью
Духа Святаго озарен, со слезами радостно
воспевал еси Богу: Аллилуиа.

Икос 6

Собрав ученик множество, отче, воздвигл еси в
Тисмане лавру великую, идеже деннонощно
возношаше молитвы Долготерпеливому Богу,
Иже тобою творяше велия и славныя чудеса: мы
же, твоя чада духовныя, в теплоте Духа
воспеваем ти таковая:

Радуйся, отче, наш учителю:

радуйся, о нас пред Богом теплый
молитвенниче.

Радуйся, сокровищнице Духа Святаго:

радуйся, Святаго Духа благое обиталище.

Радуйся, помилование наше:

радуйся, яко молитвами твоими ны непрестанно
призираеши.

Радуйся, даром слез исполненный:

радуйся, яко пролитием слез сосуд Духа Святаго
показавыйся.

Радуйся, пастырю иноков:

радуйся, христиан защитниче.

Радуйся, светлосте христианских земель:

радуйся, цевнице песней духовных.

Радуйся, отче Никодиме, чудотворче.

Кондак 7

Светлостию жития твоего, отче, удостоился еси великих дарований, еже и нечистыя духи лукавыя изгоняти: и многия ко православной вере обратил еси, преподобне: того ради радостно хвалим тя, поюще Богу: Аллилуиа.

Икос 7

Егда угорский краль Сигизмунд проси милость твою о дщери его, яже бе одержима нечистым духом издетска, и видев ю здраву и исцелену твоим предстательством к Богу, со слезами возопи ти тако:

Радуйся, отче утешения:

радуйся, уставляяй болезни верных сердец.

Радуйся, прибежище на тя надеющихся:

радуйся, духовный целителю душ христианских.

Радуйся, краля Сигизмунда удивление:

радуйся, воеводе Мирче похвало.

Радуйся, яко тя Сигизмунд послуша:

радуйся, яко той водою Крещения просветися.

Радуйся, проповедниче Православия:

радуйся, губителю ереси.

Радуйся, святых правил ревнителю:

радуйся, правыя веры проповедниче.

Радуйся, отче Никодиме, чудотворче.

Кондак 8

Естество пламене победил еси, отче, посреде огня надолзе невредим пребыв, преблаженне: вкупе со учеником твоим в пламени вопия Богу: Аллилуиа.

Икос 8

Чудящися зело беху Сигизмунд и Мирча и множество верных, тя видевшя посреде огня невреждена, отче, и хваляще силу Божию, тя хранящую, пояху ти сице:

Радуйся, естество превозшедый:

радуйся, Божественныя благодати исполненный.

Радуйся, яко и огонь тебе повинуся:

радуйся, яко посреде пламене стояй, духом в горних был еси.

Радуйся, божественный уме:

радуйся, ангеле в естестве человечестем.

Радуйся, яко всяк ум превышаеши:

радуйся, яко всех искушающих уничижаеши.

Радуйся, яко вси немы пребыша пред чудесы твоими:

радуйся, отче, огнем любви Христовы распалаемый.

Радуйся, возлюбленниче Духа Святаго:

радуйся, славо твоя святых Лавры.

Радуйся, отче Никодиме, чудотворче.

Кондак 9

Егда прииде время твоего отшествия от сего жития к Богу, был еси о том извещен, преподобне отче. Изшед же в последний путь от пещеры во святую Лавру, на пресветлый праздник Рождества Господня, вкупе со ученики твоими воспел еси Божественному Младенцу: Аллилуиа.

Икос 9

Велия печаль объят вся, отче, уведевшия о твоём прехождении от жития сего: обаче одушевлени твоим обетованием предстательствовати за них пред Богом и за вся, иже твоя помощи требуют, в радости пояше ти тако:

Радуйся, предстателю твоея Лавры:

радуйся, прибежище на тя уповающих.

Радуйся, духовное ограждение:

радуйся, наша сило духовная.

Радуйся, Тисманский ангеле хранителю:

радуйся, сладчайший монахом учителю.

Радуйся, кораблю мысленный:

радуйся, пристанище спастися хотящим.

Радуйся, наше благословение:

радуйся, прибежище нападваемым душам.

Радуйся, светильниче, светом Духа Святаго светяй:

радуйся, ангельский уме, Божия премудрости

исполненный.

Радуйся, отче Никодиме, чудотворче.

Кондак 10

Видевше преселение преподобнаго отца нашего Никодима ос-вященнаго от земли на Небо, отвратимся и мы суетнаго мира, и взыдем на божественную лествицу, да с ним вкупе воспоим Богу: Аллилуиа.

Икос 10

Приидите, вернии да возвеличим дивнаго во святых, учителя монахов и похвалу верных от Тисманския лавры и венец Горжа, великаго в преподобных Никодима и единогласно да воспоим песни хвалы:

Радуйся, нас Божиим путям научаяй:

радуйся, ненаученных учителю.

Радуйся, райское наслаждение:

радуйся, звездо, Божественною светлостью блистающая.

Радуйся, от младости Бога изволивый, мира сего отвративыйся:

радуйся, яко на твоих раменах понесе благий и легкий ярем Божий.

Радуйся, нечистых духов изгонителю и обидимым помощниче:

радуйся, чад от всякаго зла избавителю и радости тех верных родителей.

Радуйся, скорое христиан утешение:
радуйся, врачу духовный.

Радуйся, сущих в неволе утешителю:
радуйся, избавителю наш и диавола
побеждение.

Радуйся, отче Никодиме, чудотворче.

Кондак 11

Никакоже престанем проповедати твоя
многочисленные чудеса, отче Никодиме, всяку
бо болезнь исцеляеши и вся твоею богатою
помощию и милосердным заступлением от бед
избавляеши, того ради радостно хваляще тя,
поим Богу, Иже тя прославльшему: Аллилуиа.

Икос 11

На тя присно надеющиеся, тя славим, преподобне
отче Никодиме, ты бо венцем живота украсился
еси во славе Божественных светлости, и во веки
образ благочестивым душам являеши, тем
радуешься, мы, служители твоя, благочестно тя
превозносим и прославляем, зовуще сие:

Радуйся, многоценный крине и духовного жития
крепосте:

радуйся, венче преподобных и защитниче
христиан.

Радуйся, всех преподобных и всех святых
сожителю:

радуйся, Божественных славы наследниче.

Радуйся, единоголасное верных пение:
радуйся, благочестия избранный плоде.
Радуйся, светом жития твоего вся благочестию
научаеши:
радуйся, делателю тайныя молитвы, яже есть
меч Духа Святаго.
Радуйся, невидимых врагов низложителю:
радуйся, яко твоим духовным наследием Богу
поклоняемся.
Радуйся, кандило горящее святых подвигов:
радуйся, яко вси вернии тя с верою почитают.
Радуйся, отче Никодиме, чудотворче.

Кондак 12

Дивящися божественней благодати,
действующей в твоих прославленных святых
мощех, отче Никодиме, и помышляюще о
светлости, еюже тя Бог украси, с неизреченною
радостью поем, вернии, Благодетелю: Аллилуиа.

Икос 12

Показался еси образ кротости, отче, и
исполнился Божественныя благодати, вся
просветил еси, мы же тобою духовнаго мира
исполняеми, поим ти сице:
Радуйся, отче:
радуйся, архимандрите.
Радуйся, обителище благодати:
радуйся, Духа Святаго сосуде.

Радуйся, преславная деннице:
радуйся, от Бога прославленный.
Радуйся, преподобне отче:
радуйся, зовем ти, светом осияваеми.
Радуйся, наш добрый пастырю:
радуйся, сирых утешение.
Радуйся, прибежище угнетаемых:
радуйся, светлосте заблуждших.
Радуйся, отче Никодиме, чудотворче.

Кондак 13

О преподобне отче Никодиме, прими сие усердное моление наше и ходатайствуй нам милости Вышняго, и от всякаго искушения избави нас, свободи же нас муки вечныя, ты хвалящих и поющих Богу: Аллилуиа.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**